

四庫全書

集部

欽定四庫全書

集部
荆川集卷八

詳校官監察御史臣曹坦

中書臣劉源溥覆勘

總校官進士臣繆琪

校對官中書臣范來宗

謄錄監生臣李鳳丹

欽定四庫全書

荆川集卷八

明 唐順之 撰

記

重修宜興縣學記

先王因人情而施之教知夫人情所不樂則不可以從事於久不可以從事於久則不可以責其器之備而業之精也是故學校以教士而養之以禮樂以柔伏其速

成躁進之心使其終日從事於俎豆筐篚象勺干籥盤
辟綴兆之容與其弦匏搏拊笙磬雅頌歛擊歌詠之聲
盤辟綴兆其文郁如歛擊詠歌其音鏗如是耳目之所
悅而血氣之所暢也天機與器數相觸而不自知是以
能終身安焉而不慕乎外上之人九年而後視其成四
十而後試之仕而士不自以為滯也故其器之備也則
自簡廉直溫剛塞恭愿至於中和孝友皆能盡其微妙
而無有粗疎傲戾之氣其業之精也則自虞夏商周之

典章韞譯象寄之語言至於射御操縵雜服之技凡可
以為家國天下之用者能貫而通之而無有乎鹵莽生
澁之習益其磨揉之久而其勢不得不至乎此也今也
禮壞而樂廢先生之所以為教弟子之所以為學者何
也朝擊柝而聚之而課之書夕擊柝而聚之而校之文
口吻利於蠹編之誦記而思慮蔽於游詞之剽綴夫士
者之為此其不得已而應有司之求則可耳豈人情之
所樂而況聲利之燄薰心炫目又雜然而日出以非可

樂之習驅之以必可奪之誘則宜其有厭苦學校之心
惟恐其去之不速亦何怪乎業之不精而器之不備也
蓋孔門諸子嘗言志矣點獨不願仕也浴沂風雩鼓瑟
詠歌以適其意而子夏亦云出見紛華盛麗而悅有鼓
瑟詠歌浴沂風雩之樂則點也可以自足於洙泗之濱
而無所慕有紛華盛麗蕩之於外則子夏不能自必於
其中今也無禮樂以養之有聲利以驅之而欲使之終
身安焉而不去豈非勢之難者歟宜興有學舊矣歲久

不葺通判泌陽焦君希程來署縣事斥贖金之餘凡若干兩鳩工庀材以繕其事又立名宦鄉賢兩祠於櫺星門之旁以祀宦於其縣與其鄉先生之賢者而學之制於是為備既訖工教諭張君某訓導某君率其學之弟子來請記嗚呼禮樂以養士古之道其不可復矣雖然無體之禮無聲之樂流乎宇宙而著乎人心不假器數而傳則古之道固未嘗不在也誦書綴文以應有司之求士生於今不可以已矣雖然其誦書也務於約而不

汨於百家傳註之煩其綴文也盡乎已而不牽於時俗
好醜之說則今之法固不能為累也古之所謂可樂者
未嘗不在而今之所謂非可樂者不能為累則亦可以
無用於速而去之矣宜興溪深而谷窈石峭而泉冽自
古宦游之士多欲徙而家焉蓋隱然有舞雩沂水之風
而地僻以簡冠蓋文繡之所不衝大賈重裝之所不輟
故其俗鮮見紛華盛麗之習然則有點也之樂而無子
夏之誘宜莫如此地者噫嘻諸君子其務求古人之所

可樂以自足於其間以修其器與其業而無急急於務去其學也哉

重修涇縣儒學記

先王本道德禮樂經術以造士而以士大夫耆老之優於道德禮樂經術者命之以為庠序之師至於閭胥族師什伍之所鼓篋而從焉者亦無不命于上而一閭一族之間亦無非以道德禮樂經術相磨切是以上無私師下無私學周衰王道廢缺齊魯列國學校猶在不過

粉色潤飾而易象春秋十六國之樂徒以誇於諸侯賓客為古物玩具而未嘗以教諸弟子所謂學官與弟子云者詠詠禮樂徒能習其鏗鏘鼓舞而絕莫知其義其士大夫之有道德者抱其器而私相與教授于山澤之間不出戶庭而自成庠序蓋觀於洙泗之濱閭閻侃侃弦歌鼓瑟者至數千人雖數百餘年諸生以時就其家習禮焉而使觀者低徊不能去此其最盛然孔子在當時非有司樂象胥之職沒不與瞽宗之祭而弦歌數千

人者亦非所謂司徒俊士之選也自是之後西河鄒嶧傳易授詩紛然彌衆然皆與庠序無預漢興立博士置辟雍橋門觀聽縉紳動色蕃夷武卒莫不受經然祇以爲太平之榮觀而當時所謂師弟子者不在也濟南關西琅琊千乘世傳經術隱居教授生徒至萬餘人然亦不屬之庠序由此言之王教興則道德禮樂經術之寄在庠序而師道為公王教廢則道德禮樂經術之寄在山澤而師道為私雖其所寄無以異者而世之升降繫

之矣國家建學徧宇內蠻貊海徼莫不有學生徒多者七八百人少者百人可謂至盛然而道德禮樂經術之寄其在焉否也所習者不過乎章句佔畢所志者不過乎聲利榮名其所謂高等者亦惟驚文詞之博而祇以爲溺心滅質之資矜廉隅之飾而祇以成詭激矯誕之習是以豪傑之士往往病之而相與修身治心詠詩習禮考業講德於巖居燕處之間先王之禮樂經術亦稍稍賴以不墜然庠序爲虛器而師弟子爲私名論世者

亦太息于斯焉湮于寧國為屬邑而學宮圯壞不葺午
山馮公為提學嘗欲新之未克也而再為提學則以屬
之知府尹宇葉令祥率其民之好義者使出財鳩工不
足則濟以贖金之餘董其役于主簿某而視其成於學
官董汝礪鍾維揚曹鸞於是戟門壁池筍簾在列登其
堂者如入孔室而聞金石絲竹之聲丹雘黼黻儼而高
居挹其象者如見聖人而親申如天如之容其與古之
庠序亦幾無以異矣而午山公端軌物樹風聲其於為

師又非徒以其位焉者涇之俗古稱和柔而涇之士以
余所知其有聞先生長者之風志于修身治心而深病
乎佔畢聲利之為陋者固且有人焉而在乎庠序之間
自是淬磨砥礪融習氣之偏而歸之渾化破意見之障
以致乎精微相噓相染而成風俗使人皆曰先王道德
禮樂經術之寄不在山澤在庠序者涇之學則然豈不
盛歟古者首善自京師始故司樂象胥之教尤詳於閭
胥族師涇為甸服去南都三百里而近是國家之所首

善也涇之士相與務乎先王道德禮樂經術而風流乎
四旁使人皆曰道德禮樂經術之興於庠序者涇之學
始又豈不盛歟於是午山公使學官維揚與諸生張鑽
來請記余樂為之記以告於多士而勗其成云午山公
名天馭字應房蘄人修學始嘉靖某年某月成于某月
重修瓜州鎮龍祠記

龍之祠不秩於三代之典記禮者謂之四靈蓋以為鱗
蟲之靈者耳其祀始見於封禪書朝那龍湫今天下大

水之濱無處不有龍祠宋之儒者論大河之治以為不
宜祀龍曰是天地之功也龍何力之有然余竊以為未
盡也夫天地無為而百物之肖像於其間者莫不各致
其能以效其功而天地未嘗與之爭功然而百物之功
孰非天地之功也至於昔人之制為祀典也凡有功德
於天地之間者不問細大莫不羣然秩而祀之以致其
報而未嘗疑於與天地分功然而所以報百物之功亦
孰非所以報天地之功也吾觀於蜡而見古人通乎鬼

神之情而悉于幽明之故矣夫生成百穀以粒民孰非
天地之功若是則古人為之禋為之社以報之可矣至
於大索鬼神而蜡焉者何為也其蜡也先農先嗇庸與
坊焉可矣而至於迎貓迎虎而昆蟲亦登焉者何為也
惟天地之生成百穀雖一貓虎昆蟲亦使之盡其能於
食鼠食豕之間而無遺利焉於此見天地之功為甚大
人欲報天地之功而無由則雖貓虎之效一能於天地
者亦秩之祀而無遺靈焉於此見人之所以報天地之

功者為甚深凡百物之靈固莫不肖氣於陰陽五行而龍得陰陽五行之氣之精故其變化尤靈貓虎未嘗無功於田而謂龍盡無功於水乎祀貓祀虎未嘗疑於與天地分功而獨疑於龍乎且夫天地之間大者不自擅其大而寄於小小者各務致其小以歸於大其為力也大者常逸而小者常勞其功之成也小者易以為德而其大者常不可名故耕鑿之民不知帝力之何有而至於一社之長一邑之令則人煦煦然而嚮之死則為之

尸祝而俎豆之此豈可謂忘大君之功德而顛顛於一社長一邑令之為報哉又豈可謂一社長一邑令之功德而非大君之功德也哉然則龍何疑焉而不祭於古也曰百物之祭古矣又安知古之不祭龍耶古有豢龍氏豢龍氏之於龍安知其非如伊耆氏之於蜡實掌其祭者耶所謂豢龍者其無乃羞飲食以祀龍之謂而好怪者遂以豢龍為畜龍也歟龍乎可畜其亦非所以為龍矣古今大水凡四而河與江為最河移徙潰決不常

而江獨為安流意必有宰乎其間者而龍之奔走以効其靈也亦不可謂無瓜州據江之衝則其建祠以祀龍也亦宜祠不知所始歲久圯壞嘉靖癸卯奉化王侯杏始為揚州府同知署府事乃斥贖金之餘修之而使道士某來請記王侯儒者也其為是舉也必有以通乎鬼神之情而悉於幽明之故矣余懼後之人泥於舊說而以為非經之祀也為之著論如此使龍其安且食於此而無慚焉且使讀者其亦無以余為語怪也

重修解州關侯廟開顏樓記

嗚呼漢建安迄今二千餘年而侯之烈自縉紳先生與小孺子皆能道之赫赫若目前事其廟侯而尸祝之者自都會以至一井一聚且徧天下而解人之慕侯尤深烝嘗伏臘尤虔以勤者以侯之為其鄉人也解人之廟侯也久矣而為樓以棲樂者則始於國朝弘治時其扁曰開顏而樓蔽東西南三面若張幄然其南樓撤於正德間東西兩樓亦久且壞鄉人某某等復醵金葺之又

樹坊其南以承樓之缺而侯之居益崇且嚴矣侯以死
事於法得祀又侯故為將軍封列侯漢制列侯將軍得
賜饒歌鼓吹其沒而葬也得用破陳凱樂則鄉人備樂
舞祀侯宜也於是某等因其鄉之士大夫員外郎丘君
某來請文按侯始識玄德於草莽卒然之遇而遂授之
以肝膽死生之信至於崎嶇顛沛西東奔竄而其志愈
不可奪窘於俘虜之中而其志愈明蓋侯之大節磊磊
如此而論者特稱侯之雄勇冠世而深惜其功之不就

以為侯之兵不先加於腹心之吳而先加於肘腋之魏
不先加於藏戈背伺之吳而先加於露刃面拒之魏故
其勝魏也未足以肥蜀而其信吳也乃足以自斃且操
權之不敵也久矣操也且懾於侯之威至欲徙都以相
避使侯當時先吳之未發而圖之豈不可以得志噫此
亦有數焉耳然使侯為摧鋒拔城之將孰與使侯為伏
劒死綏之將也侯始遇玄德固相許以死而已幸而得
死侯又何求且夫摧鋒拔城之將勲庸著於當時伏劒

死綏之將風采傳於後世勲庸在當時者身沒而響微
風采在後世者既遠則人愈悲而思之此固世之所以
尸祝於侯而解人所以慕侯之深者也不然古之雄勇
如侯而能摧鋒拔城者豈少哉皆身沒而響微可以觀
人心矣解之為州在太行上黨之間昔人論五方之俗
以為山西慎忤而好氣而慷慨毅武奇節之士多出於
其間若介子推先軫狼臆繭相如馮服君諸人雖或死
或不死皆耿然如寒冰皎日不負其志所謂偉男子者

也侯從玄德於崎嶇顛沛之中似子推威震乎敵國似
相如馬服其賈勇死敵又偶與軫暉相類豈慷慨奇節
之士多出於山西而侯其傑然者歟今之山西古之山
西也吾不知其俗之懍忩而好氣於古何如而慷慨奇
節之士抑豈無有出乎其間如古人者歟然則解人之
所以拳拳於侯者非徒為侯也蓋將以鼓其所趨而成
其秉節倡義親上死長之風也夫書以侯之

常熟縣二烈祠記

昔人論女子從一於夫比於臣從一於君之義自古奸人篡竊而其故臣不幸以才見籍錄于斯之時彼有棄瑕用讐之圖而我有佯合觀釁之便苟其黨有可攜事有可濟則逞於一擊以誅讐而復國若王司徒之於卓段司農之於泚此其勢逆而其事之難以必者也彼有棄瑕用讐之圖而我堅委質策名之誼寧死而不二其心寧死而不二其君若豫讓王蠋之說此其勢順而其事之可以必者也二者其所處不同而其要於自盡則

一也是故生也而無迂身於微倖之嫌死也而無自經於無濟之愧女子之於夫則亦有然者矣嘗讀史所載孫翊妻之事而壯之當二兇貪於翊妻之色而殺翊也妻既見窘逼於是藏機匿哀陽許二兇以婚而緩其期陰結故將為援須二兇以婚入而遂刃之雪不共天之憤於閨闈杯酒之間斯亦可快矣若夫二烈之事則異於是其夫以羈旅浮寄江壖非有可以豫藉之勢環而指者皆兇人之黨也非有肘腋可結之援方張島之誣

其夫以盜而沈之於江島遂欲室其婦而島之黨欲室其女於是婦與其女倉惶闔門自刃以死嗚呼可謂烈矣雖然二人者豈不欲手搥讐人之胸如孫妻之為以報夫與父哉而勢有不能也則一死而其事辦矣故嘗合孫妻與二烈之事論之苟機有可乘而速忿以必死則殺身而無益苟事無可濟而濡忍以有俟則危逼而近辱此亦其所處不同而其要於自盡則一也二烈死時兇黨哀其尸而焚之其事秘無人能發之者後數年

巡按陳君蕙詞得其事島與其黨始伏辜此蓋足以見
節義之氣有時而必伸淫兇之誅有時而必不能遁也
歟二烈者固不必手搢讐人之胸而後為快矣事既白
於是知縣羅君鴻為之立祠以祀扁之曰二烈而無錫
安君如石請余為之記嗚呼此義行不特所以勸節其
亦深所以懼兇也歟是有關於世教大矣烈婦某姓其
夫某姓而逸其名相傳自通州而徙常熟之某鎮也

零陵縣知縣題名記

名者其起於古之所以勵世乎古之所以勵世其法莫備於史史之法莫嚴於春秋史家者將以紀善惡而垂法戒而千百年之善與惡不可勝書也則舉而寄其詞於名姓稱謂之間春秋之法微者名姓不登於冊書其非微者則槩而登之是史家之常法而無所擇乎其人焉者也其有不然者或微而名或非微而不名或書其姓而奪乎其名或書其名而又奪乎其姓其斤斤不肯輕予人以名姓也如此而後得登名姓於冊書者足以

為重是史家之變例也今夫人望其容貌而問其人之
善與惡者有之矣過其室廬而問其人之善與惡者有
之矣識其姓名而問其人之善與惡者有之矣故古之
圖容貌表室廬紀姓名使善者因之以久其善惡者因
之以久其惡其為教一也零陵楚之南徼也邑乎郴桂
之間瘴癘之所濡苗獠之所鄰往往不能得善吏而邑
之譜牒亦散佚無可考自余父有懷公少時則已聞先
伯祖平樂公始宰是邑有惠愛及為永州欲按其故蹟

詢其姓與名雖邑之耆老亦無知者考之郡志所載零陵令之姓與名亦無有也已而更索民間所藏景泰中所撰舊志則稍具其姓名政事歷官大畧而其名亦已誤復為福矣有懷公為之慨然而歎因復思國家二百年之間其邑之善令多亦有如平樂公或僅存其姓名而又誤或并其姓名而湮沒焉者當不啻幾人而其奸回饕餮乘令之威肆虐吾民者亦幸而逃其名於後世豈非志於懲勸者之所悼歟於是蒐輯散逸得某君而

下若干人以為是皆令也則槩登其姓名於石以著於世雖然後之人過而指其名有不就而問其為令之善與惡者乎問焉而知其令之善也雖百世有不愛而慕之如其人之存焉者乎問焉而知其令之惡也雖百世有不唾而譙之如其人之存焉者乎是則其為令也善而名之也甚於旂常之載焉其為令也惡而名之也甚於鼎象之鑄焉所謂美惡同詞其亦春秋之法也嗚呼其善者益不忍欺乎其民而斬以自盡乎其心初豈有

意身後之名也哉其不善者蓋亦愉快意於一時自計
以為其去官與其身沒之後且影響銷盡人無復指之
者豈知更千百年其姓名並彰著而不掩若此嘻其可
懼也已

廣德州同知蔡侯政績碑記

蔡侯之始去州也州人哭而送之境後十餘年侯以宦
游過江南有傳言侯將取道於州州人喜於復見侯也
逆諸境數日侯從他道去州人哭而歸則相與謀紀侯

之政於石於是署州事判官張君遣陳生潘生來請為之書石余辭謝後一年知州歐陽君繼遣陳生濮生來復以請曰先生與蔡侯相知為深宜為之書余復謝曰余惟與蔡侯相知之深也是以未敢為之書夫蔡侯者居乎今而學古之道者也古之道盡乎已而不蘄乎人先其實而深避乎其名不然畏壘之民規規然感慕而俎豆之此庚桑子之所為懼而逃去者也且古之以循吏書於其傳者有之矣其在當時權任既重且專其居

官也又久而信是以能為百姓立殊絕可紀之功而後
史氏因書之為傳若蜀郡以興學書南陽以溉田書書
渤海也以弭劇盜書膠東也以增戶至十餘萬自漢時
得書者纔數人而一人又各以一事殊絕自見而已自
此之外其緣俗而治者豈遂少哉則以其事無殊絕故
不書也蔡侯蒞州之日淺矣又州佐也操柄所不在故
其所可見者大率緣俗而治侯之心且自謂不能有殊
絕功德加於細民而歎然不以為足也侯之所不自以

為足而州之人乃欲為侯張而侈之不亦拂乎抑古之
以循吏書於其傳者非特以殊絕之故亦以位不至通
顯其所樹立施設止於一郡一邑而不究乎其大者故
史氏亦從一郡一邑書之而謂之循吏傳若黃潁川薛
馮翊其治績尤異固不在于蜀郡渤海之後以其事業
有大焉者則不得從一郡一邑書之故不以循吏而別
自為傳蔡侯行完而才鉅以方顯庸於時其勒之竹帛
而銘之鼎彝固將有待若夫一州邑之績豈足為侯書

之由前言之殆非侯所以致謙之意由後言之殆非州人所以尊侯之意也二生起而對曰先生為蔡侯言之則可矣而未始為州人慮之也廣德負山之州也往時為吏者惠州人獷悍多豪黠齟齬不可理以柔道於是切爭為嚴峻深文痛法以繩督之而人亦遂相傳以為非刻深不可治廣德益州人之蒙茲詆而病焉者久矣蔡侯乃獨先教化而後誅罰事無劇易處之一以鎮靜人無奸良御之一以誠慤是以侯既去而人懷思之

至今嗚呼此豈深文峻法之所及也哉由此言之州之
所以為治者蓋在此而不在彼也是故州之人欲為之
書以示後之為吏者使知州之所以為治者在此而不
在彼也余曰若是則可以書矣蔡侯名克廉字道卿泉
之晉江人中嘉靖己丑進士今為江西提學僉事其同
知廣德也以刑部郎中坐獄事謫以某年至州某年遷
廬州府同知以去皆宜書

鎮江丹徒縣洲田碑記

古者與天下為公而泉布其利然山川林麓天地之產金石鉛錫萑蒲鹽蜃鳥獸翎革之瑣細莫不為之厲禁而名山大澤雖封諸侯不以及者非自封殖也懼夫利孔不窒而爭獄滋繁則是以其利人者為人害也其慮可謂深矣丹徒環江為邑沿江上下多有蘆洲其為利甚鉅而新故之洲時沒時長故不入版籍而人據以為私每一洲出則大豪宿猾人人睥睨其間畢智殫賄百計求請或連勢人以搖官府必得乃已及不可得則讐

其得者而相與為私鬪甚者構亡命挺矛稍陰賊公闕
於叢葦高浪之間相殺或數十人官司逮捕輒反覆解
脫獄案滿筐篋積十數年不可詰絕故洲之爭未已而
新洲之爭又起於是丹徒之視蘆洲如懸疣枝指之著
體非特其懸與枝而已且痛連於骨體而怵於心畜為
瘡蠱不治日深而丹徒綰水陸之口厨傳日費數十金
謂之班支郡邑公私筵燕諸所狼籍歲費且數千金謂
之坊支間里騷然苦焉不可以已也莆田林侯既莅郡

日夜問民所利病除所不便深知班坊苦民而未有以處也適會有洲田之訟於是慨然諭於衆曰吾欲祛兩害以興兩利可乎且夫古者山澤之利其權一歸於上而今擅於下古有遺人掌客道路委積賔旅廩餼之奉其費一出於官而今役乎民權宜歸於上者而擅於下則孔漏孔漏者啟奸而人以殃費宜出乎官者而役乎民則歛重歛重者積蠹而人以貧今若一切反此二敝使擅乎下者歸之於上役乎民者出之於官塞其漏孔

而蠲其重斂因天地之贏以濟人事之乏收豪民之腴以代貧人之瘠是蘆洲之果為茲邑利也而又何病乎衆謹然曰侯議是侯又以丹陽水陸之衝與丹徒同而並練湖田為豪民所擅與蘆洲同思推所以處丹徒者處丹陽也乃并二議以請於巡撫公巡撫公是之請於巡按公巡按公是之既得請於是痛繩其豪之爭洲者與其侵湖者而歸之官而兩邑廢寺之田附焉總洲與湖田寺田之所入而勾其贏縮以代故時班坊之所出

裁其濫而存其不可已者於是出入之數大略相均以
嘉靖癸卯九月而計籍成如其籍而行之遂以為故事
邑人既深德侯而恐後之人不能守侯之法也而又恐
豪者惡是之病已而欲壞之也相率請於邑令茅君而
鑿石以記凡洲田與寺田之在丹徒者為畝共五千三
百九十五歲入租二千九百石有奇易金可若干兩蘆
薪歲易金可百兩山薪歲易金二十六兩以代故時班
坊之所出定其額凡為金四百兩而羨凡湖田與寺田

之在丹陽者為畝共三千四百五十有奇歲入租千七百石有奇易金可若干兩湖魚歲易金可二十兩以代故時班坊之所出定其額凡為金四百兩而羨藏其羨以待歲收之所不及而間出其羨以賑凶饑自癸卯九月至乙巳五月總羨金九百八十二兩米千五百九十石有奇其纖悉列之碑陰其區畫出入則計籍具存林侯名華字廷份篤志古道為政一本經術余嘗為序其口義者其惠愛在民多可書茲以記洲田也故不及

裕州均田碑記

裕州於春秋隸楚蓋楚屈完對齊桓公之言曰方城為城今方城山在裕州境山旁有楚壁壘斥堠云地故阻險然四衝西脅武關東挾江淮北綰河洛南隙宛鄧四方輻湊其民平居則奔走送往逆來諸費輻輳百出天下有難則往往首先受兵野多陂陀磽确土雜砂石不純可田種以故俗罕土著苦窳寡畜藏輕剽數徙無錫安侯來牧裕既爬剔宿蠹拊循疲瘵與裕人更始先是

主計之臣議括天下田檄至裕安侯矍然曰此吾治裕
首務哉且夫平濬沃清錢穀息訟爭在此舉矣未幾檄
復下止之安侯曰人苟利矣吾專焉可也亟請於參政
劉君副使傅君各是之於是經土劃野則耆艾董其役
縱橫廣袤則量人展其能方弓勾股則筭人竭其思跡
阡驗畛則區長與程事因區制畝因畝準稅區為綱畝
為目綱以麗目則無漏畝畝為母稅為子母以權子則
無逋稅以衍原隰膏腴之田一而當一平石岡田二而

當一岡石山田三而當一山石陡坡四而當一陂池林麓解宇鋪舍廛市之稅例蠲除田溢稅則從增稅益田則從減咨詢徧故人無遁情版籍明故上有定徵疆土別故下有定輸計田凡一萬三千二百四十頃有畸計稅凡九千二百六十石有畸侯規畫精密動中肯綮此其大凡也史氏曰孟軻有言仁政必自經界始自衛鞅首禍壞井田開阡陌以迄於今其間經國之臣憂時之士曷嘗不言經界然卒莫能行何也蓋亦難焉守令歲

月更改各懷一切無慮經久一難也語曰天降雨澤農夫悅而行旅怨豪強兼并率不以均田為便謗讟朋興多口可畏二難也守令不能履畝而較之則必寄於吏胥則有上下其手者矣豪右售賕得為蔽匿貧弱抑勒無以自明名曰均田實滋一弊孔也此三難也夫安侯可不謂明察深慮者哉安侯初舉事時裕人亦多訛訛者曰將無擾我安侯不為動既訖事迺人人樂業矣民可與樂成難與圖始顧不信哉安侯名如山己丑進士

其為裕多善政茲不書重均田也

建陳渡石橋記

陳渡橋去郭南十里而近當邑西南諸鄉與宜興金壇孔道近郭而又當孔道故往來于其上者踵相踐也橋故以石為之其始作與其既毀而易之以木皆不知在何時今獨有石趾在耳而木橋又不一二歲又壞壞則輒更而作之夫屢壞則病行者屢作則勞居者而費且不勝計非石不可以久而莫之能任也會有浮圖人德

山至遂慨然諭於橋旁之人曰吾力能辦此衆皆曰然
因請山為主而相與以貧富為率出錢若干緡不足則
山使其徒募錢于四方共得若干緡買石若干募石工
凡若干其財取諸願助之家而不費官帑之一錢其力
取諸傭食之夫而不勞公徭之一卒始於某甲子某月
訖工於某月嘻可謂易矣蓋山之為人吾知之有粟必
以施餓者而終歲自食糠粃有錢可以易衣而嘗衣碎
衲行雨雪中其苦行有足動人者是以募人而人爭應

之役人而人不敢愛其力宜其成之若是易也於是友人蔣君英玉吳君鎮之為之請書其事夫橋梁王政之所有事也徒枉缺而國僑致譏川梁隳而單公以刺然特語夫長民者耳矧所謂浮圖者固與世漠然絕不相值者也山口不粒粟身不全衣以此自足而絲髮無所假於世亦可矣乃復能急人之病而閔閔于一橋之成也如此則彼長民者固衆之所跂而望以庇焉者耽耽焉居飽祿以嬉其于人之疾疹阽苦則瞽瞍而莫知蓋

先王一切所以捍災備害生人之道泯然盡矣其所缺者寧獨一橋也哉嗚呼此不為而彼或為之其亦可以觀世也矣德山某所人其橋旁居人出錢者凡若干人

華氏義田記

義田者其古道之遺乎其起於古道之廢乎古有之大宗者收族者也義田者其大宗之遺乎雖然有大宗則無義田故義田者其起於大宗之廢乎古者因族而立之宗族人有餘財則歸之宗不給也則資之宗其族人

如胥膂手足之相與為一體其財賄如津液之經緯溶
灌於其間惟其所虛則注焉而無有乎臃腫羸乏之處
是以舉族無甚貧甚富之家而天下之為族者莫不有
宗是以天下無甚貧甚富之人豈非所謂人人親其親
而天下平者哉井田廢也而始有以貲甲於鄉宗法廢
也而始有以貲甲於族甚則有童奴厭臠肉而族人操
瓢者仁人君子惻然隱之於是以其力之所及為之義
田以贍其族蓋猶有大宗之遺焉然義田立而大宗之

名益隱矣要之義田非甚厚有力之人不可以為而宗法則百金之產亦可以相通義田非仁人與族為體者不能以相公而宗法雖纖嗇鄙薄之嗣亦不得而相吝是以義田之為制也狹而偏大宗之為制也均而溥然仁人君子其知既足以及乎此矣卒莫有推而及乎彼者豈古今之勢然耶抑亦以義田出於力之可以自為而宗法非上之人為之制則固莫能相聯屬耶何其宜及焉而莫之及也吾友無錫華君從龍積學好古之士

也晚舉進士不數年遂請歸其於人間事既已屏絕不挂意而獨不能忘族人之飽饑乃割近郭田千畝為義田推其遠胄自十一世祖錄事君而下之子孫皆籍之其不能自業者給口食其婚娶槥瘞給各有差略如范氏故事自十二世祖而上其族疎人衆則惟視其窶甚不能就塾與過時不能嫁者娶者槥者瘞者則量助之其管鑰以付錄事君宗子而推擇族人之賢者一二人專理其事不稱則易其人而君之子孫則將別有處焉

不使分給其中夫君之為此舉其可謂仁人君子之用
心矣又能寓宗子法于其間豈不尤為近古者乎余是
以本宗法之與義田相興廢之說而為之記使君之知
足以及乎此者其尚益推之而及乎彼也哉

救荒渰記

嘉靖癸卯至乙巳東南薦饑溧陽史君恭甫既三捐穀
七千五百石以助公家之賑而饑者猶不給也邑故多
渰以匯水其沙漲渰在邑西北十餘里潦溢旱縮不障

不陂棄為曠土久不可艾君既隱民之饑則計之曰古
蓋有興役以救饑者吾試行之且夫歲凶土荒民不足
於食而有餘於力以力易食是民以不足為有餘也吾
今日出粟於廩而異日取粟於渰是吾以故粟為新粟
也人力地利兩易而各得不亦可乎乃度渰之東南隅
廣長各三百五十丈可渰可防測水以準而疆焉遂請
於官募民興工民攜老弱就役者踵至君環堤而茨焉
以居之每役一人日給米二升銀一分薪一束時米貴

其民以半米易麴菽而雜食之計一夫赴役自食可兼
食其老弱瘠病之不能役者二人於是民之棲於堤者
爨煙飯餼列舍相接翳然如處村落之間日出則畚者
鍤者築者揀者汲者爨者蟻旋於堤上夜則婦子抱哺
嬉嬉而卧又晏然如在樂土而忘其為流徙饑饉之時
也其始因渰之底深之為中池以蓄水出池之土環之
為堤堤之外又環之為外堤以捍水外堤之北更深之
為北池而竇其東西陲以通中池之水半北池之土更

築北堤又於外堤之外並渰三面而溝之出其土更築
小堤以捍渰之暴水內堤之內三面為池出其土高築
之以為架屋之所自乙巳八月至明年四月畢工而麥
適登民謹然散歸曰史君活我核其費為銀若干兩米
若干石大率日役若干人計所全活若干人共墾田四
百餘畝為圩者三潦則水碍堤不得壞田旱則引堤內
之水灌田可四千餘畝並渰而田之家多賴以濟自是
百年沮洳鬱為沃壤水降土升不相溷漬各効其職以

宜地產萑翟既去生我稻梁堤之隙地亦樹蔬豆緣堤
蔭池夾植榆柳池中畜魚蝦蟹麇羸生生不浚於是即
其地立為義莊歲計田與堤之入與池之魚利易穀可
得千石歲儲之以待荒歲之賑一不以給家用君又將築
書舍其間以待鄉之來學者而未及也因更名其渚曰
救荒渚以其邑人進士繆君所為紀實來請記蓋周禮
上有荒政以聚民而下復有閭相受黨相收州相卹以
通其羸乏猶懼其未也則又使世祿地主之有力者與

其廣瀦鉅野之可以利民者曰主以利得民曰藪以富
得民以是彌縫上下之所不及其民遇凶禮或不見聚
於上必見收卹於閭里不見收卹於閭里必見得于地
主廣瀦鉅野之間其生路為甚多而天災地沴欲死之
而不能也民生其時豈不幸歟後世有司救荒之法既
疎濶不講又無古鄰保之義以鳩民民有饑饉疾疫日
夜祈死而已余親見乙巳之灾流莩滿野民之不忍為
盜賊而自經死與糜其子而食者日幾何人余思欲上

下強聒而不能而又無力可以及人也徒惻然傷之而已今之世無周禮所謂主者然貴家大族之有力而望於鄉者則亦有主之誼而豬野閒田則往往有之然非有力不能興是以主與數相聯而成功今觀史君所為而益信古之所謂利與富得民者其不為迂濶也然古之所謂主者皆與有長人之責而世其祿食其責既無所諉而祿又有可藉故其行之則易君既居閒無所責於世而纖豪皆割已之有乃殫力經營若家人之饑然

者以是知君之為尤難也嗟乎使有力者皆如君其所以興起禮俗而有裨於國家休息生養之效豈小也哉余既自以其無力而有感於史君乃樂為之記史君名際嘉靖壬辰進士磊落多才略嘗為吏部主事不究其用而去故其施諸家者若此云

大觀草堂記

尚書西磐張公既歸老於家以書來屬余記其大觀草堂者曰願子為我言大觀之義我雖老矣而不敢不勉

也蓋余嘗獲聞公之為人進無驚於寵辱而退無詘於
隕穫躬盛德之容而謙乎其若不足甘委順之節而坦
乎其若有餘其幾乎古之與天游者歟竊意所謂大觀
者公既已獨得之於心而人不能知而余也執器而不
通于方曲學而不見乎天地之全是儒之陋者也而惡
足以知公之大觀矧公之所謂大觀蓋得乎心而寄之
草堂者也公之得乎心者既深乎其不可窺而想像乎
公之草堂之景則其戴形肖貌露情獻態森然而萃以

縱乎公之所觀者吾又未能即而登焉以觀公之所觀也而惡足以知公之大觀而又惡能為公記之雖然余未能登公之草堂以觀公之所觀而嘗登吾之草堂以觀吾之所觀矣方吾之心閒而無事以逍遙乎草堂而觀於魚鳥之飛鳴而潛泳煙雲之出沒而隱映融然若有疑于精爽然若有釋於神是以物無逆於目目無逆於心而心無逆於物一旦情隨事以遷勃焉而有鬪於是而心逐逐焉而目眈眈焉凡向之飛泳而出沒若有

凝於精而釋於神者舉皆不知所在矣徐徐焉鬪解而
機息乃始還而觀之則草堂向之草堂而煙雲魚鳥向
之煙雲魚鳥也於是為之憮然而一笑嗟乎嗜欲有蔽
乎其中則凡物舉皆得而匿乎其外物舉皆得而匿乎
其外則雖與之游乎瀛海之表而騁乎垓溁憑虛之域
亦窅然若無覩也而況於草堂乎夫大觀者通宇宙而
為觀也故謂吾草堂之景非公草堂之景不可謂吾所
觀於吾之草堂非公所觀於公之草堂者不可則願以

我所觀於吾之草堂者而記公之所觀於公之草堂者
以為公之能得其大觀蓋不蔽於欲而物不能匿也

西峪草堂記

靈寶陝洛之衝也環而山者以數十而西原獨當其僻
處西原蔽秦山之南委蛇數百里散而藪者以數十而
西峪又獨當其最深處峪口偏仄始疑路窮忽然中開
更出異境茂樹淺草森陰蔽虧水泉瀟瀟若驚蛇出沒
草間其人鹿視而穴居可二十餘家於是許君廷議游

而樂之乃即峪口作草堂於其上仰而眺秦山俯而顧
西峪煙雲竹樹隱見千態不下席而盡取之其勝又於
是為最己亥歲予見許君於京師君為人邈達魁岸尤
以兵自雄余固意其必且為國家建萬里勲也一日與
余論草堂之勝且曰吾將去而休乎此矣余笑而詰之
曰君不聞馮文淵昆弟之相笑者乎夫鬼才傑士其所
寄意必於奔瀟洶湧之川巔屹崔巍之峰決滌千里之
野極世間險恠瓌偉超曠之觀然後足以饜其耳目而

發其跌宕濩落不羈之氣若夫耽水竹之清幽蔭樹石之翳薈此則窮愁枯槁之人漠然無所振於世而有以自足其樂於此夫固各自為尚而不能兩得也今君試料才氣與文淵少游竟何似國家且北收河南南繫交首之頸假令據鞍躍馬今之人孰能先君者乃欲乘欸段優游閭里自比少游其寧可得耶三門之間洪河巨石怒而舐擊砢砢磕磕若戰鼓然百里之外有聲而殽函又秦漢以來百戰故處過而覽者莫不躊躇慨然想

見乎揮戈濺血號虎喑鳴之雄此皆險恠瓌偉世所駭
詫且近在君衣帶間君何不寄意於此乃欲自託於寂
寞背鬼才傑士之好而就窮愁枯槁之所樂此又何說
耶噫嘻吾知之矣君居河上豈嘗受河上公語耶故曰
養辯于其訥藏勇于其怯然則君之欲為彼而姑為此
也其有意乎脩而蠖屈脩而虎躍則余不能窺也已

任光祿竹溪記

余嘗游於京師侯家富人之園見其所蓄自絕徼海外

奇花石無所不致而所不能致者惟竹吾江南人斬竹而薪之其為園亦必購求海外奇花石或千錢買一石百錢買一花不自惜然有竹據其間或芟而去焉曰母以是占我花石地而京師人苟可致一竹輒不惜數千錢然纔遇霜雪又槁以死以其難致而又多槁死則人益貴之而江南人甚或笑之曰京師人乃寶吾之所薪嗚呼奇花石誠為京師與江南人所貴然窮其所生之地則絕徼海外之人視之吾意其亦無以甚異於竹之

在江以南而絕徼海外或素不產竹之地然使其人一旦見竹吾意其必又有甚於京師人之寶之者是將不勝笑也語云人去鄉則益賤物去鄉則益貴以此言之世之好醜亦何常之有乎余舅光祿任君治園於荆溪之上徧植以竹不植他木竹間作一小樓暇則與客吟嘯其中而間謂余曰吾不能與有力者爭池亭花石之勝獨此取諸土之所有可以不勞力而蓊然滿園亦足適也因自謂竹溪主人甥其為我記之余以謂君豈真

不能與有力者爭而漫然取諸其土之所有者無乃獨有所深好於竹而不欲以告人歟昔人論竹以為絕無聲色臭味可好故其巧恠不如石其妖艷綽約不如花子子然有似乎偃蹇孤特之士不可以諧於俗是以自古以來知好竹者絕少且彼京師人亦豈能知而貴之不過欲以此鬪富與奇花石等耳故京師人之貴竹與江南人之不貴竹其為不知竹一也君生長於紛華而能不溺乎其中裘馬僮奴歌舞凡諸富人所酣嗜一切

斥去尤挺挺不妄與人交凜然有偃蹇孤特之氣此其
於竹必有自得焉而舉凡萬物可喜可玩固有不能間
也歟然則雖使竹非其土之所有君猶將極其力以致
之而後快乎其心君之力雖使能盡致奇花石而其好
固有不存也嗟乎竹固可以不出江南而取貴也哉吾
重有所感矣

永嘉袁君芳洲記

介乎永嘉左右者若天台雁宕之恠巧瓌麗甲天下其

間嘉卉美木蓊然雜植雖博物者亦半不識其名品故自古好遊之士輒以永嘉山水物產為第一宗喬以為是非吾好之所存也吾獨好橘於是種橘數十本於洲上遊而樂焉因以為號曰橘洲主人又曰芳洲主人視其意蓋極世間名山水自以莫如吾洲一切嘉卉美木自以莫如吾橘也而間請記於余余始亦訝其迂且僻而笑之既而歎曰宗喬可謂自足其樂而不羨乎外者矣夫趣有所適則不必其地之所勝意有所鍾則不必

其土之所珍嘗試觀於草木之生雖其奇花異卉至不易生之物或絕遠生在海外苟以人力移之而樹藝擁灌之如其法則東西南北惟所徙焉既久而炎冷燥濕之性亦隨變矣而橘也確然獨異乎是蓋昔騷人為之頌曰受命不徙生此南國是草木中之專一耿介者也夫騷人彙萃天下之香草美木以況其幽馨窈窕之思然皆未有特為之頌者其於橘也特為之頌豈偶然感觸而假物以發興也哉取其臭味之深有合焉耳宗喬

少業儒而以醫自進其志行耿介又雅慕王喬羨門子之道翩然有迫隘斯世輕舉遠遊之思窺其貌蓋未嘗以肉食之故而變其山澤之臞也其自寄於橘也殆亦有騷人之意乎余愧無橘之德亦頗以迂慙不通於俗余家故隣太湖太湖橘數也余將買山種橘於洞庭之上而老焉清秋霜落搔首而歌楚頌欲以招宗喬宗喬其許我乎否也

吳氏墓記

昔范蠡所自稱述得計然之策七其五用以霸越其餘用以起家而白圭之徒至自比於呂尚孫吳其言頗近誇誕然跡其料穰惡節贏縮權取予亦有道焉蓋足多也自子貢取譏於孔子而儒生遂不敢言治產不知人固不能裸形而枵腹則亦不能無所營而取給且夫公卿大夫修仁義躬教化以導氓俗庶人勤膂力盡山澤之利阜貨賄以給公上各有常業不能相廢而儒生欲槩以一說則過矣吾鄉吳翁衆所指為樸忠長者然翁

自少工治產累數十年遂以貲雄邑中觀翁所為大率
能取人所棄與人所取能知予之為取能擇人而任時
徃徃與古人暗合所謂修其常業儒者莫能訾者也翁
始家邑之南隅既老則治別業於徐湖之上穿池養魚
優游其間又於其旁度地為葬所雜植材木翦然塋寔
羨道室廬門垣既周以固朝夕徃遊而樂之以待其終
而葬焉嗚呼死者人之所必不免也而世俗多諱言死
至以石火易盡之身而枉苦其心神豫憂逆數動輒為

門戶千百年計慮皆若可以目睹而足履曾不量其身
之不待及形氣衰枯死徵已見而尚持籌操鑰勾較米
鹽斤斤如不及不自虞其死至於病且死也徘徊顧慕
周覽其家之所有戀戀不能舍一物而去此又世之殖
產者恒態吳翁乃于生時預為葬地其營壙也如營其
室家其植木於墓也如植於園圃往來松楸墟壠之間
不為之悽愴悲懷而顧以為適頗似能視死為歸而知
生之不可貪死之不足患庶幾委命而順化者其與沒

溺牽纏于厚利不能自反者固有間歟墓可數畝材木可數百株土石之工皆樸而不華祀田若干畝帶墓左右以翁之力能自侈其墳墓而所為僅若此此又可為世之破產厚葬虛地上以實地下者之一勸乎翁葬後幾年而其孫嵩與嶽求余記其墓余不能辭也為之書若其世系履歷子姓之詳則銘誌具存而支隴向背起伏風氣散聚此堪輿家事儒生所不窺故皆不書

休寧陳氏墓廬記

墓祭非古也其起於人之情乎禮起於情之不能已故
雖好古執禮之士亦未有能非之者也休寧陳氏墓在
某地于墓左个有廬若干楹歲時上塚則血牲而祭于
廬環廬有祭田若干畝作廬者陳君萬秀葬而奉以祭
焉者萬秀之父筠軒翁也萬秀故客武進與余父游至
是走其子憲以狀詣余請記且寓以書曰嗚呼萬秀先
人在布衣中非有奇節偉行可以不朽然子孫筑筑之
志竊願徼惠于君子錄其一二事可紀者而鐫於廬之

壁庶幾使我後之人其無忘乎按狀筠軒翁名帥英字希武父名原以行誼著鄉曲陳氏之先自唐末始家歙之休寧其里曰滕谿若干世又自滕谿徙宣仁翁今所居也陳故有顯人在宋有為翰林學士者勝國時儒人定宇先生櫟實生其族載在譜牒翁為人倣儻好義歛人多賈而翁故亦以賈業翁在儔輩中岼然長者魁傑之氣正德癸酉間岢源姚賊羣起流劫徽郡以旁近賊故檄民為兵守險扼鋒翁與在行間師克捷翁以多有

司給銀牌一為賞辛巳歲今上即位迎母后于藩道
江徽當遣役人供張往江上徽郡守推擇部民為衆
信者使督以往遂以屬翁時暑甚翁老且憊觸熱旦
暮馳至大洪嶺病死郡守愍然遣人舁其棺還之家
休寧令給銀為埋具以旌之翁以毗庶凡兩從王之
役然桃源之役縱橫鋒鏑間去死隣耳翁竟生歸且
受賞江上之役其事不過奔走輸將之間絕非險阨
然竟以死固可謂之數也翁卒以某月某日年幾十

有幾葬以卒之某年月日徽之俗羯羆喜鬪小睚眦則叢然挺而相擊然用之於義亦往往慷慨前死不避其氣然也翁豈其人乎春秋之義以王事出疆而死則為之加等此固為有列于朝者言也其亦可以通之庶人矣乎余既哀陳翁死役之義而矜萬秀之志故為之記翁子三人萬玉萬瑾萬秀其季而孫憲來求余文者也

吳氏石亭埠新阡記

石亭埠在郭南五里蓋陽羨一小山耳而發其奇者自
順山吳公始陽羨諸山多峭拔而是山獨蹲伏蜿蜒以
其伏也而峭拔者乃若環而揖焉諸山皆競秀而是山
獨若不見其秀者然登是山則諸山之秀可盡攬而有
之如人之謙而尊又如人之深藏不自炫露而萃衆文
以文其身也公遊焉以為奇于是出之灌莽豺狐之窟
而築之室以居因其泉甃而曲之以為池閒則與客即
而觴焉自是石亭之勝聞於邑中而地理家亦以是為

吉也即山居之旁而壤樹之以為生墓及公之卒也則
遂葬乎其中而賓從戚友嘗從公遊者于是又以送公
之葬而至焉以公之所嘗遊而眷然於公之不可作也
則為之悽愴而悲懷順之言曰夫公達人也豈有所介
介於生死往來之間哉昔者公之來遊也當其朝煙方
散而夕霏又凝春華始歇而夏木載陰宇宙之景既日
新而不窮投壺賦詩惟意所適鳴琴角奕分曹更進人
事之樂亦遞代而不厭于斯之時孰不以為此樂未極

而公則已譙譙然亟為身後之圖培壠樹櫟若恐後之
以公之達蓋不待奏雍門之曲而知樂之必有盡其從
公游者又不待聞山陽之笛而知聚之必有散矣夫葬
者藏也藏者息也此其無知而不可以生致者也雖然
高臺未傾曲池如故果木花卉手植猶存其有知而可
以生致者又安知其不且往來嬉戲乎其間春猿之與
唼而秋鶴之與飛矣乎以公之生而游也有不忘乎其
死之圖孰知公之死而息也有不遺乎其生之樂者耶

此可與通乎幽明生死之故者道也故余為此言以慰公而且以慰夫嘗從公游而悽愴悲哀於公者公諱仕字克學為人剛重有廉隅博學而文少發解南畿舉進士歷官提學副使其為副使也坐不能俯仰故早乞身焉而足其樂於谿山泉石之間公晚而有二子駢驛其所交多當世豪傑在同鄉中與養齋徐公相交尤深以余之無似公亦忘年而與交焉余寓陽羨時公數邀余飲于茲山之上而公之營墓嘗埋雞卵穀芽五色線以

驗其氣則余及見之蓋公嘗屬余記其所謂山居者而未果也及葬公之弟滄溪翁傳以新阡記為請嗚呼不及記其山居而記其阡焉其亦可以復于公矣

敘廣右戰功

紫江沈公自襲指揮使時未弱冠已能馳馬手搏賊賊憚之未幾調征永安嘗以數百人擣陳村寨賊牆立山上公一人拍馬而登賊却下山誘公入淖中馬陷以吻拄淖中而騰其足及於陸三酋前趨淖刼公一酋鏢而

左一酋刀而右夾馬一酋殺弩十步外公捩頸以過鏢而挑右足以讓刀鏢離頸寸而過刃着於鎧韙然斷鐵公射鏢者中缺項殪左挂弓而右掣刀斫刀酋于鎧間斷其頰車折齒殪弩者恟失弩僂而手行上山公又射之中臂既連斃三酋後騎至找其首公以二酋讓後騎而囊斷頰者自為功餘賊麋而入箐追兵戰於箐中斬首若干級毒弩中公膊整軍而還驗功或以斷頰者非全首難之監軍吳布政怒曰賊豈伸頸而待斬乎命紀

之以功遷都指揮僉事義寧賊寇臨桂掠而還巢公追之巢有兩隘賊伏兵丁嶺隘以伺使熟瑤以某隘閉告而導公入丁嶺公策之斬所閉隘而入果無兵守於路擒販者數人以丁嶺之賊告遂牽以導巢而熟瑤亦以公斬閉隘告丁嶺之賊賊還趨巢大破之賊奔公獨逐一酋酋騎而走崖窘釋騎跳而下澗公騎跳而下澗澗深沒顛馬浮而岸毛盡濕束濕馬于樹緣澗而求酋酋泅而逃矚水中影射之血縷水上入水斬之後騎相屬

至厓望見公提人頭立水中厓峻不可跳乃尋路從公則賊遁已遠公乘濕馬與諸騎追之猶斬數十級而還荔浦賊八千餘渡江而東寇諜者告公倉卒率五百人待于江岸駐白面寨去蛟龍滑石兩灘各數里諜者又告賊飽而歸將及江公以為滑石灘狹牽線而濟雖衆可薄也蛟龍灘濶成列而濟衆難圖矣吾欲奪其濶而致之狹令製旗軍中無尺布伐岸竹揭竿而編筏以為繆刻頃成數百旗插之蛟龍灘令羸卒數十人守之燃

柴煙以疑賊賊至果避蛟龍趨滑石公分兵兩岸而潛以小艦載勁卒數十伏葭葦中賊營于中洲以護濟濟且半公以艦乘瀧急衝之兩岸軍譟而前有酋騎而水立挺鏢當艦公舍艦跳水斬鏢酋人騎皆踣洲上賊辟易賊濟者西奔巢未濟者却東走上山而復潛趨蛟龍灘以濟洲賊孤艦軍攻洲兩岸軍始至下水夾攻之洲賊後行擠墮淵溺死無算其前行盡俘之得生口首級若干收賊所掠牛畜之在兩岸者是役也以五百人破

八千餘賊公用奇徃徃如是復以功遷都司同知嘉靖六年岑猛叛聚兵數萬人督府奏誅之一日督府召公計曰歸順岑璋猛婦翁也助猛奈何公素能得土官陰事曰璋女失寵而璋心恨猛徒貌合耳公復密語督府云云如此可使璋擒猛督府復曰猛乘上流之勢擁兵建瓴而下則邕梧諸郡危矣奈何曰此不足憂土官大率飽富貴戀巢穴所以叛者懼誅耳非有他志也猛離田州而子女玉帛皆在彼或乘虛襲之猛安得不慮乎

督府又慮猛且走交趾曰猛走交趾則閉不能歸矣猛安得不慮乎猛果如公所料而岑璋雅敬公公潜使人于璋於是督府進兵分五哨入猛勁兵盡在工堯諸將死讓無敢當者公自請將中哨當工堯去工堯五里而軍進攻隘隘堅復退營五里而糧且盡湖兵五千人請於公願得一飽而死敵公時僅有自贍家糧五十石與湖兵人給之升而官軍縮腹張目以觀湖兵分米不敢言公無以為計時左哨將與公隔江而軍公潜濟江就

左哨將乞糧而請并兵攻工堯左哨將以分地拒公公笑而還曰兵糧吾自有之姑試公耳左哨將慚公還軍乃夜分軍三百人緣山而右走間道三百人緣江而左上山並繞出工堯背挿旗為號煮餘糧為稀糜食而遣之黎明合戰賊殊死鬪我軍却麾而進又却公親斬却者一人而提其頭以令軍復麾而進先所遣間道卒皆已至登山挿旗初岑璋既與公為約而遣兵二千人陽為助猛守工堯遺精卒千人以護女為名居猛左右璋

兵在陣後望見山上旗大驚曰天兵得工堯矣潰而却
猛軍見後陣却亦蹶而却我軍乘之斬猛子邦彥于陣
中蹂尸數里遂入隘得其積粟軍始飽乘勝攻田州猛
聞工堯破窘急欲走交趾而璋卒五百人護猛妻以歸
五百人獨守猛指猛所欲走給之曰此路皆天兵也不
如且走歸順為後圖猛不得已從之璋待于境相見因
相抱哭璋以子女歌舞飲食恣猛圖留之而潛遣其子
報公于田州公入田州五日而諸哨始至璋所使報猛

所在者事頗洩左哨將移軍壓歸順境索猛欲破敗公
事自為功璋以二十牛百甕酒犒軍而謂左哨將曰猛
誠有之公無急也于是醉猛而斬其首函送督府斬他
囚首貫猛尸而以與左哨將左哨將喜於得猛而抽軍
獻猛首督府則猛首已梟一日矣猛死田州平安置猛
子邦相於福建而議設流官公曰思恩設流官反側至
今未息田州復然兩賊且合從起矣督府不聽且調公
守田州公請以他將假守三月而待希儀治裝他將守

之一月而田州酋盧蘇果與思恩酋王受連兵劫城他將狼狽歸田州復為賊巢公又言於督府曰兩酋能用其衆以復故主為名今若返岑邦相于福建而置之南寧此奇貨也可使兩酋坐受縛矣督府復不聽而徵兵數十萬征之既而失利督府以罪罷新督府餘姚王公至其所以撫定兩酋公多與其謀因薦公右江叅將右江故治柳州柳在萬山中城外皆賊巢軍民至無地可田而室廬妻子數被焚劫知府劉璉殪于賊知府鄧鉉

間出城弩中其膊自是諸軍民官必甲而後敢出城城
兵又疲不足仗公為叅將始議剿五都五都去城五六
里而巢最險賊又最獷所虜獲人畜最富巢中不聞官
兵者百餘年公乃以五百兵付百戶蔣紹宗使搗其巢
賊蜂出裹我兵殺數十人而隘其入路使不得返我兵
即賊巢為營固守而因賊糧以為食然氣奪不能戰賊
亦欲坐踣之于是百戶潛遣人爰而告急於公公即上
馬復聚兵得五百人入巢為援既至聲銃者三因奮擊

賊百戶兵聞銃聲亦出奮擊賊賊分兵為二腹背戰我
兵鼓譟斬級賊不支然尚橫鯁兩陣中守隘不肯散公
使人芟而以勝告百戶百戶亦使人芟而以勝告公公
因謂百戶曰汝且據巢毋出待賊服乃已不服更夾攻
之可盡擒也賊素怯柳州兵最易與至是訶曰汝誰也
敢入吾巢公使人紿曰是新叅將老沈所率藤峽軍耳
兩江賊熟老沈名而憚藤峽軍因咋舌曰吾固知柳州
兵不及此相持數日賊不退然心懼因熟徭為解熟徭

者界漢人生徭獐間陽附官軍而陰附賊或官軍勢盛
附官軍賊勢盛附賊以為常于是熟徭間說於公曰請
為兩家解鬪公度賊尚勁乃且聽其說而謂熟徭曰返
我生口牛馬我兵乃去賊以所虜生口二十牛馬百四
十為獻賊收衆奔山頂而空隘以通百戶兵公兵與百
戶兵牽連行至城城中人謹始知柳州兵之能戰賊也
公以為欲大破賊非狼兵不可右江狼兵惟那地最勁
乃請于軍門以那地兵二千戍柳州柳之有戍狼兵自

公始先是賊勢張甚而熟徭及城中黠吏民多為賊訶者賊耳目徧官府左右官府閨閨動色情性賊在谿崙千百里外輒知凡議大征或鵬勦口語沓沓未及聚兵而手足盡露以是賊得陰為備或伏巖數伺官兵殪之或先徙妻子畜聚于鄰巢而自空巢以待官兵官兵至徒手無所得甚者我所任為鄉導往往為賊誤我入死地崩墜厓谷不戰而糜爛者過半而賊以耳目故益知官軍虛實與民積聚少多乘虛掠多所入無一當而所

噓無不飽我兵築堡增戍則益紛然如刻穴守鼠而賊
活脫不可蹤跡公以為圖勝筭莫如得賊情得賊情則
莫如諜而使官府人為諜則賊生疑于是陰求得素與
徭人商販者數十人假以買物召至府密謂之曰吾素
知若輩通徭吾不罪若更與若銀為販本若試為我詗
賊衆感諾乃人給銀五兩使益買物散入諸峒中諸徭
雖凶暴樂殺人然販者至則寨寨傳送護衛飲食恐損
一販者則諸販不至是以雖絕棧深箐販者無所不歷

每有動靜販者輒先知奔走報公公厚賞販者而秘其事雖肘腋親近絕不得聞至期鳴銃者三則諸兵皆聚第謂之曰今日出某門而遣心腹人為旗頭引諸軍諸軍貿貿行問旗頭旗頭不知曰然則汝何引我曰公強我往我漫往耳軍行千萬人其所往獨公與旗頭兩人知之而已頃之劄營設伏賊果至遇伏奔追殪之已而賊寇他所則公軍又已先在或絕遠村聚賊度官軍所必不至而潛寇則公軍又已先在賊始驚以為神而我

軍亦不知公自何得之也公始至柳令諸猺得出入僨買游戲城中無禁諸猺時入府見公公兒女撫之久之稍稍擇其巧便曉事者結以厚賞使訶賊後賊發其火伍中輒報公公又厚賞之而間謂諸猺曰若見我若妻子何不来見夫人諸猺叩首不敢公曰試令其来已而猺婦五六人来夫人好言慰勞賞之針線包帕諸物以銀簪替其頭又命諸妾婢灌之以酒人數大碗察群婦中其夫嘗以賊事報者則又陰摘之他所勞苦之曰若

夫為吾大人盡力良苦私賞之包帕銀簪諸物倍於人
前所賞者而益以珍果美物塞其袖中又陰戒之勿令
人知也諸猺婦既多得賞又酒醉踉蹌舞手出府門猺
夫望見之歡喜爭前掖而歸巢自是諸猺婦來者至數
百人夫人傾筐篋針頭線尾皆盡猶不能給而猺婦相
戒以勿令人知者猺婦又洩之以所獨得珍果美物誇
諸猺婦以為夫人愛已諸猺婦皆怏怏心羨嗾其夫使
報賊冀已入府得珍果美物而公間使人往諸巢中陰

以夫人之命賜物諸猺婦自是賊中消息或諸猺不肯
言則猺婦嗾之使言或諸猺竟不肯言者則諸猺婦自
以使人至巢賜物時附耳語云云若勿向我老公語也
公用兵風雨來去既得賊時率輕騎剿其尤劇者一二
人兵至巢以管為繩繞記劇賊家示諸軍所捕繩之內
老弱婦女牛畜無一免者繩之外老弱婦女牛畜無一
及者遂出巢數里遇平地度賊援所不至則停軍審究
其為劇賊家婦女牛畜者收之其雖獲于劇賊家而係

鄰家與鄰巢者還之諸徭得完室家與見還者皆喜以
為往時官軍入巢見人輒殺或賊遁則搜斬不為賊者
以充級故賊詈我輩我雖為賊時得脫或保孥皆汝輩
雖不為賊時見殺或孥皆為虜自今我輩乃有顏面詈
賊矣公入巢有助賊戰者既還軍遣熟徭檄之曰若奈
何助賊戰吾勦若無赦頃之擣其巢盡殲之自是凡所
鵬勦歷數百巢竟無一人敢助賊戰者鵬勦所過他巢
或弓弩而門閭既還軍則檄曰若奈何弓弩而門閭今

罰若五牛不者且勦自是所歷百數巢竟無一人敢弓
弩而門閭者所獲劇賊多不殺剜兩目則兩耳賞銀數
兩而還之巢自是他賊有所虜掠多不遣兵而用剜目
者騎而一人牽以詣賊使徵所虜掠賊見之驚曰某巢
某也震懾不敢隱盡還所虜掠而剜目者索不已賊至
出自所有與之公以給被虜者而以其餘給剜目者剜
目者每一入巢則利益多而為賊者所獲每不補所償
則益無利在柳州所剜目七人其六人皆為官用其還

巢而復為賊者單萬星一人而已公竟以計擒殺之公始議發兵故制欲發兵必請督府督府檄下乃發公以為吾治文書吾掾史知之文書上府府檄下我府掾史知之多人知則洩又柳去督府千里待報踰時坐失機會而書檄往來水陸諸巢絡繹能保不為賊得于是凡率兵入巢未嘗先請既勝則上首虜督府而以邂逅追賊至巢為解於是督府不能以文法詰而兵謀得無洩公嘗欲勦一巢而恐其洩也乃佯病所部入問病公曰

吾病思鳥獸肉若輩能從我獵乎因起出獵去賊二里而止營軍中始知其非獵也公耳目多賊不能數率走之他巢他巢人又嚇之曰公且勦汝則又走之他巢他巢嚇之則又走跣血瘡以死或餒槁崖谷公又每以甚雨淒凍風冥之夜察賊所止宿處四散遣人賣火銃以筒貯火衣毯衣毳帽與草同色潛至賊所夜聲銃者二賊盡驚老沈至矣挈妻子裸而蒲伏上山頂兒啼女眺往往寒凍死或觸崖石死不者且為虎咬諸妻子更相

嗟怨汝為賊之利至此黎明下山訶之則寂無人陰使
其黨至城訶之時公所遣衣毯者四散諸巢同夜舉銃
明日諸巢所使為訶者亦同會于城旁西巢人謂東巢
人曰老沈昨夜來吾巢東巢人謂西巢人曰老沈昨夜
來吾巢則固已更相怪駭已而訶之城中人則老沈固
安坐城中不出也益怪駭曰昨聲銃者誰耶鬼耶諸猺
又自相嚇曰虎咬人者老沈所使也自此賊益膽落或
易面為好猺獐而柳城四旁一童子牽牛行深山數百

里無敢訶者其軍民往往寄牛於猺家以耕或索雞酒
於猺猺不敢不與公在柳先後十三年名賊宿猾幾盡
而韋扶諫者馬平四都猺賊弩中知府膊者也兇猾甚
先是嘗七捕之不能得至公亦七捕之不能得會有報
扶諫逃隣巢三層巢者公潛率兵勦之至巢則扶諫又
已與三層賊往劫他所而三層賊妻子獨在公盡俘以
歸計七十餘人平時公所俘賊妻子盡以與狼兵為賞
至是獨不與而閉之空室中善飲食之公又陰使狼兵

數百人怒而挺刀猙獰入室恐諸婦女作欲搶狀公佯執鞭痛鞭狼兵使退如是者三欲以深德諸婦女而潛使諸猺聞之以繫其心公又使熟猺謂諸猺之亡妻者曰吾不害汝但得韋扶諫則還汝妻子矣諸猺四五人來投公公令入空室視其妻夫妻相持哭其小子牽其父哭妻曰非沈公吾為狼兵殺且搶久矣已而怨相詈曰咄扶諫非汝爹非汝娘何不縛以贖我諸猺心割而別復見公公曰欲得扶諫耳諸猺曰扶諫已逃他巢圖

之實難雖然願公切勿以吾妻子與狼兵也吾且為公
緩圖之公曰諾因殺牛犒諸猺而去之諸猺踪跡扶諫
所在遂往以言惱扶諫曰還我妻子扶諫不應諸猺因
曰我輩失妻子計窮惟有更隨汝作賊耳扶諫喜諸猺
乃說相與計曰今官府虜吾妻子而穿山驛與守堡百
戶與巡司俱在山中今往劫之三印可必得也官府懼
失三印得重罪以易吾妻子可必得也扶諫曰善扶諫
既離巢則黨益孤諸猺因醉扶諫與其黨而縛之置巖

洞中而使熟徭報公曰得扶諫矣恐見賣可遣吾妻子
於三十里外相易公以為吾不遣諸徭且謂吾怯於是
鎖諸徭妻刃挾之以行至三十里使熟徭諭諸徭曰諸
徭且劫妻子者先殺妻子然後戰諸徭請於公曰吾獻
扶諫懼讐公可遣三十人至巖洞自取之公慮諸徭有
變乃選健卒十五人賞而遣之曰得扶諫吾且賞汝若
諸徭殺汝者吾且重賞汝家又以十五人付之熟徭而
質熟徭妻子曰十五人者損一人汝妻子盡粉矣至巖

洞中果得扶諫而出諸獠閉之五里外懼扶諫往而妻
子不至復要公曰必相易於此公又曰吾不往諸獠且
謂吾怯於是先遣諸獠中妻女四五人往言刃挾諸婦
女狀諸獠吐舌懼殺妻子帖息不敢動遂易扶諫以歸
剗扶諫目截耳剔心手足斬之而四懸諸城門諸獠出
入城者見之無不股慄諸獠既熟公威信公嘗調一巢
徃征他巢雖懼讐然不敢不徃牛畜盡俘以歸獨首虜
生口視狼兵為少耳公亦盡以所俘牛畜賞諸獠其後

復調而與之期會天大雨諸獠懼失期乘雨泅溪水沒者六人公勞苦之命沒者人三牛付其家其餘皆遣還之自廣西為將如韓觀山雲惟能使獠人不作賊至公能使獠攻獠則廣西所未有也十六年而有思恩岑金之變初思恩府土官岑濬叛被誅而立流官以其酋二人徐五韋貴為土巡檢分掌其兵各萬餘人而聽於流官然夷民獷悍不樂漢法數十年間凡數叛則數舉兵誅之而亦不能定也當破岑濬時調兵鎮安鎮安掠思

恩生口以歸已而其中一人長大而姣因託言岑濬子而名之曰金夷民益思亂鎮安乃潛召其酋長出金而與之盟曰汝小主也諸酋感泣擁金以歸鎮安因要之曰金立與我某地幾百里遂盟金而遣之諸酋聚兵五千人以奉金將攻城郭復故地諸夷多欲為響應者勢洶洶而先時濬既誅其酋楊留者無所歸乃率其黨千餘人詣賓州應募為打手賓州兵素弱故倚打手至是留欲往投金以逞時公與兵備皆在賓州留入言於公

曰留小主人在請往公方慮岑金之危思恩未暇慮留
之在肘腋也聞留言獨心駭以為金去賓州數百里而
留應之表裏相扇賓州危矣賓州危則咽喉哽咽喉哽
則廣右盡騷而何有于思恩此事大不可急圖宜以計
款之乃婉色好語謂留曰汝第往我曩征田州調兵鎮
安時已聞有岑金在是岑濬第九子也留聞是言固已
刺心公因叩留曰聞鎮安繫金甚堅何因出乎留詭曰
百計逃耳公低聲作自語狀曰岑氏其復乎欲以深動

留而呼留至密所曰為我一言語金若欲官必毋殺人
劫城若欲殺人劫城任汝自為之金能聽我言可以狀
訴我及諸上司留唯唯公遂與留銀十兩而以花紵方
摺之納留懷中為我寄金得官後為衣衣之可常念我
也公復給留曰金欲官非賂我萬金不可留曰金誠當
盡力然金方倥傯安能辦此公笑曰吾豈遽責金耶且
欲得一帖為信耳自是益信公無他腸矣留出公又呼
還謂之曰我幾忘之韋貴徐五素仇汝亦仇金可善備

之無墮彼計也留詣金具如公言金大喜真謂倚公可得官矣因率其兵五千人詣賓見公至城門門者懼而報公請無內金公怒罵曰金非賊奈何不內覘者以告金金心益安率其衆散入城而與留及其親信二十人皆衷甲見公公曰金來乎留曰來矣金叩頭潛以萬金帖子奉公公復笑曰若窮鬼安得此乎金曰賴公力得官不窮矣賴公力誠不敢忘報公子孫公戲曰汝土官多不知恩汝得官且忘我矣況子孫乎金唯唯不敢公

乃令其姪出見金曰金汝兄弟也金得官他日每一出征乞金四功與汝公復為金計曰汝賂我兵備公獨無賂乎金對不敢公曰第寫帖子吾為汝致公以兩帖子示兵備笑而火之於是遣金詣兵備始金叛而留且往兵備甚懼公潛與兵備計此事大禍叵測公夷情未熟一語蹉跌敗矣不若一以聽我兵備唯唯及見金但言吾視金有福相以微動之且曰此事一聽沈公明日公詣金營犒之五牛酒五十尊又明日兵備犒之如公公

復召留與金謂曰倘兵馬殺金是吾殺金倘暗箭刺客
殺金是貴五殺金非關我事今一以付留可無賺金也
留乃日夜甲而擁金為備公復遣其姪至金營與金同
飲食卧起金自是心死于公矣公欲縛金而憚其衆時
巡按在南寧將誘金至南寧乃縛之乃請兵備先往密
語巡按以故公謂金曰吾挈汝訴巡公吾代汝詞公為
金作訴稿塗抹四五次以示忠於金復謂金曰吾與汝
往寧南倘貴五伏人于路暗箭射汝不若易汝土官裝

衣青衣雜掾史中而先我馬令五千人後行金如公言
路中飲食公與金同席語金曰貴五以重賂賂吾庖使
毒汝則奈何自今以後吾所食汝亦食吾所勿食汝亦
勿食可也金如公言而益以公為愛已行七十里至思
龍驛公晨起耳語金曰今往南寧南寧人皆言汝叛聲
甚惡以五千人往則人益疑汝不若散遣三千人而選
心腹健卒二千人以往是汝不撤衛而坐息人言也金
以為然選二千人往復行一日去南寧百里公謂金曰

汝至南寧久候而諸從人衣糧懼不給不若以千人營
於此而以千人從為便金亦以為然從金至南寧者纔
千人金入見巡按巡按好語慰之曰吾為汝奏明日巡
按遣人至金營犒其衆而留金以待奏居五六日公度
金衆衣糧且盡復謂金曰思恩去南寧近耳何不遣其
半取衣糧而坐待糧盡衆且散矣金復遣其半衆行金
所遣千人營百里外者久之亦以衣糧乏稍稍散去而
獨五百人尚散處城中公欲縛金而又以為五百人者

迫死而狼鬪則殺傷幾何更欲為計而金所遣取衣糧者適至則從金者又千人矣公知金未可動間請于巡按公且往南寧而以金從可于路圖金也至思籠驛忽報韋徐將萬人在陽以迎巡按而陰襲金金驚而跳公與兵備巡按聞之曰禍矣公謂巡按且陽為不知而聽希儀徐圖之公出呼韋徐罵曰汝安得擅兵至此金得官與不得官唯朝廷所命汝安得私讐之是時金尚駐近地覘視而韋徐部中亦有為金耳目者金聞公言復

還公行三十里金道伏候公公曰岑金耶汝尚不知死
貴五兵至矣可疾入賓州匿吾叅將府則貴五無如汝
何矣金馳馬入賓州公復于巡按曰金入賓州矣巡按
兵備至是始有面色自金往南寧返賓州飲食起居無
不隨公居數日韋徐復私公曰請甘心于金公又怒罵
韋徐亦莫測公計所出也公密請於巡按散遣貴五衆
而後圖金然是時金衆尚千餘人與楊留所統殺手千
人皆在賓州内外公與兵備計公可遣楊留殺手百人

護巡按往柳州公問謂金曰楊留殺手百人護巡按往柳州矣汝盍將百人護送四五十里以自結乎至五十里金欲返公又拉之行百餘里金又欲返公曰汝獨弱勢弱倘貴五伏人待汝奈何今去柳且近汝何不與留偕至柳而偕還金遂以百人至柳其酋長十餘人皆金死黨驍健會金於路躍馬而墜公以機責其酋五六人曰何不護金而令至此痛扶之五六人皆病創卧然尚以公愛金故被扶不敢恚公金至柳入叅將府公命夫

人見金曰金我兒子也金得官聽調往來貴縣吾縱不
在汝必見之金益喜置酒勞金與其酋是時諸大酋其
五六人既病扶卧獨四五人從金而留所部打手百人
與金兵百人皆營於城外柳城故有狼兵二千人足以
虞變公將縛金先以狼兵三百人護巡按三百人護兵
備而以三百人入叅將府待事謀既定因酒中戲謂金
曰痴兒子汝往時懼誅又懼貴五逼意常不樂今無事
矣何不痛飲金與諸酋皆盡飲至醉其夜遣狼兵縛之

黎明遣人召留於城外狼兵夾墀左右立留與其黨三十人見公公大言曰非楊留忠不能成我事以銀十兩勞留取紅紵挂留留愕然公曰汝為之而汝不知乎金國賊也非汝與吾同心誘金至此吾安得縛之留大駭泣下曰留小主人也公曰汝為之而欲誑衆乎公意又欲以疑留于其黨也留懼不能言其黨三十人皆股慄公復曰吾且為留奏功矣因見留於巡按巡按勞賞之如公見兵備兵備勞賞之如公勞城外二百人牛酒而

令留率之還賓州遂令留賁牌散遣金衆之在賓州者
曰所誅止金一人留既惶恐見紹又虞同行者猜已賣
金相讐見殺于路中日夜跼蹐為備奔歸頃之遂發病
死金兵聞金縛皆散去公乃以金與其酋之病扶者醉
而縛者解巡按府而撲殺之思恩復安當是時使公不
先款留則金必不至而且攻城殺人使公在南寧賓州
縛金則困獸之鬪何所不噬使公聽韋徐甘心于金則
兩客相閔而主受其釁惟公緩之又緩以漸脫金于五

千人之手若剥笋然待其為一夫而後縛之人以是益多公之算而韋徐諸土酋亦益謂公不可測也公見督府於梧時鹽船八十餘阻峽賊不能前左江孫叅將千人送之不能督府以命公先時公泝峽峽中大酋侯公丁嘗謁公公寄六羊令公丁牧養至是遣人取羊于公丁公丁奉羊至潯公命諸鹽船牛酒犒公丁與其從人謂公丁護船上峽公丁身居公舟尾命其黨乘小舟護船囑曰吾以身質於沈公護不謹吾碎矣公因命班首

一人與公丁從人護船至武宣未返時孫叅將與左江
兵備聞公丁在公舟欲乘間捕之而密言于公公曰此
斷不可人信我而我詐之不祥招而縛之不武且獲一
人以疑諸夷將焉用之此斷不可公居常有所徵召雖
其深谿絕岸未嘗不來其來雖桀猾宿惡未嘗輒殺
其可諭者諭之其不悛者必遣還巢而後捕之故公以
此語兩人兩人猶豫未決公乃摘公丁告之故曰可亟
歸矣公丁大感泣去而公所遣班首護鹽船上峽者亦

至不失升斗公以報督府督府笑曰孫叅將千人乃不
如沈叅將一班首十八年七山之役奪兩叅將于虎口
功尤奇公膽勇機警善撫士其私財與所得俸祿賞賜
半以給諸人為耳目者其出兵多賈私財以行有先登
與斬首者就陳給賞不失頃刻故人爭盡死力公嘗笑
曰人以貲財積賄賂而博官吾以貲財積首級而博官
豈為非計哉其征陳村時染危疾所部皆自戕于神前
以禱公乃穿手矛刺股鉤刺脊繫鐵鎖拽之痛毒諸體

皆徧最後至者一人無所施乃箭貫喉為禱其得士心
如此蓋余宦游而得當世名將數人北則馬永梁震西
則何卿南則公震與卿余未之識而識公與永永魁瓌
長貌而氣特沈毅見人頰首下視寡言笑公短而精悍
目炯炯燭人議論磊落激發皆所謂偉男子也公與余
稍談及廣西事余是以得撰次之公戰功尚多余不盡
聞也公謂余言當世固多良將患在牽掣齟齬不能展
噫嘻若公者猶為未盡其用哉

荆川集卷八